



*Senin, 29 November 2021*  
**Ogen: 2 Samuel 20:3**



**Encukupken Keperlun Geluh**



**A**braham Maslow ngataken maka lit tingkat kebutuhan geluh eme: 1. Kebutuhan psikologi (kula eme pangan, ingan tading ras sidebanna), 2. Kebutuhan rasa aman, 3. Kebutuhan kasih sayang, 4. Kebutuhan penghargaan, 5. Kebutuhan aktualisasi diri. Limana kebutuhan enda tersehi maka ikataken manusia e sejahtra.

Daud sekalak raja bangsa Israel, selaku raja enterem kal gundikna lit sepuluh kalak. Gundikna enda kerina tading i bas Istana. Ogenta enda nuriken maka icukupina kerina kebutuhan secara psikologi. Keamananenna pe ijamini arah litna pengawal si isikapken man gundik e. Tapi kebutuhan kasih sayang la idatken gundik enda sabap itading-tadingken Daud ia rusur; la pernah ras medem, gedang-gedang geluhna serap i bas kalak sideban nari, janah nggeluh bagi diberu balu-balu. Teringet pe kita sada syair lagu si ngataken maka "bagi perik bas sangkar emas". Emas ingan tading, tapi labo ndatken kebebasan terbang bagi semalna kin perik-perik sidebanna. Janah enda me si gejakken gundik si sepuluh kalak e; tading i bas istana si erkecukupen, tapi ngeluh bagi diberu balu-balu. I bas kalak Israel diberu balu-balu e; la iergaken, la masuk perkiran pe.

Lit pengakap maka adi enggo ibereken sen guna keperluan geluh enggo me bias. Lang. Kebutuhan psikologi si tersehi la njamin kesejahtran, tapi seharusnya rikut-ikut min ras keperluan kekelengen i bas keluargata nari. Banci sikataken maka enda salah sada kekerasen si jarang teridah tapi tergejap kal. Tentuna arah si enda ibabai kita guna mbangun jabu si dem i bas kekelengen. Kekelengen e palas si enteguh kap guna jabunta. Ula terjeng ncukupi keperluan anak, tapi arus pe ncidahkan kekelengen arah rananta si lembut, "sentuhan" ras perhatianta man bana. Iperluken keseimbangan guna ncukupi kebutuhan enda segelah nanam keluarga si simpabu e ternanami se isi jabu.